

19.10.2021

UKA2021/ 45

UKA2021/29: Meeqqat, inuusuttut inersimasullu akornanni naqinnernik ilisarinnissinnaangitsut aamma atuarnermik allannermillu ajornartorsiuteqartut pillugit nuna tamakkerlugu iliuusissanik pilersaarusiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Sofia Geisler, Inuit Ataqtigiit)

UKA2021/47: Naqinnernik ilisarsisinnaangitsunut kalaallisut programimik ikiutinik sanasoqarsinnaanissaa pillugu nalunaarusiamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aslak W. Jensen, Siumut)

UKA/73: Inatsisartut isummerfigisassaattut siunnersuut Naalakkersuisut peqquneqassasut kalaallisuumik naqinnernik ilisarinnissinnaangitsunut misissuummik ineriartortitsisoqarlunilu atuutilersitsisoqarnissaannik meeqqat atuarfianni ilinniartinnilu ingerlariaqqiffiusuni atornerqartussatut.

(Inatsisartunut ilaasortaq Nivi Olsen, Demokraatit)

Atuarsinnaanermut allassinnaanermullu ajornartorsiutilinnut naqinnernillu ilisarinnissinnaangitsunut ikiorsiinissaq anguniarlugu arlaleriarluta Siumut sinnerlugu Inatsisartuni saqqummiussaqaqartarnikuuvugut inerititaqartarnikuullutalu. Assersuutigalugu Knud Rasmussen Højskoleani ukiuni arlalinni atuarsinnaanermik allassinnaanermillu ajornartorsiutillit naqinnernillu ilisarinnissinnaangitsut pikkorissarneqartarnikuupput aamma siunnersuuteqartarnitta kinguneranik atuarsinnaanermik allassinnaanermillu ajornartorsiutilinnut naqinnernillu ilisarinnissinnaangitsunut iluaqutaasunik suliaqartoqartarnikuuvoq. Ukiuni kingullerni atuartitaanerup aqqissuunneqarnera tunngavigalugu siusissumik iliuuseqartarnissaq ilanngunneqarnikuuvoq anguniarlugu meeqqat immikkut pisariaqartitsisut piaartumik ikiorsiiffigineqartarnissaat.

Inuusuttorpassuaqarpoq atuarsinnaanermik allassinnaanermillu ajornartorsiuteqaraluarlutik naqinnernillu ilisarinnissinnaangikkaluarlutik allatigut piginnaaninik ulikkaartunik soorlu assassornikkut, kisitsinikkut allarpassuarnillu piginnaanilinnik. Ilisimavarpulli ilarpassuia atuarsinnaanermik allassinnaanermillu ajornartorsiuteqarnertik naqinnernillu ilisarinnissinnaanginnertik tunngavigalugu tunuarsimaartartut, naak atortorissaarutitigut ikiorsiissuteqarnikkut allatigullu tapersuinikkut ilinniakkanik angusaqarluarsinnaasaraluartut. Taamaattumik atuarsinnaanermik allassinnaanermillu ajornartorsiutillit naqinnernillu ilisarinnissinnaangitsut tapersorsorniarlugit ilinniakkanillu naammassinnittarsinnaanerit



aqutissiuukkumallugu Inatsisartuni ilaasortat pingasut, Aslak W. Jensen Siumut, Nivi Olsen Demokraatit, Sofia Geisler Inuit Ataqatigiit siunnersuutaat ataatsimoortillugit tamakkiisumillu tapersorsorlugit ataatsimiititaliamut susassaqtumut ingerlateqqippagut allannguuteqassappatalu ataatsimiititaliami susassaqtumi nalilersorluarneqarnissaat innersuussutigalugu.